

## **Qaffasinnerusumik ilinniartitaanerit pillugit Inatsisartut inatsisaat nr. 14, 12. juni 2019-imeersoq**

### **Kapitali 1**

#### *Atuuffia*

§ 1. Inatsisartut inatsisaat una atuutissaq qaffasinnerusumik ilinniakkanut neqeroorutigineqartunut, Ilisimatusarfimmit, qitiusumik inuutissarsiutinillu ilinniarsiit aamma ilinniarsinnit allanit neqeroorutaasartunut.

*Imm. 2.* Qaffasinnerusumik ilinniagaq tassaavoq ilinniagaq annerusumik teoretiskiullunilu atuagarsorfiusoq, ilinniarnertuutut soraarummeeqqaarsimanissamik piunasaqaatitaqarfiusoq, tamatumunnga ilanngullugit immikkut aqqissuussamik ilinniarnertuunngorniarnermik ingerlatsineq imaluunniit inuutissarsiummik ilinniagaqarneq. Qaffasinnerusumik ilinniakkanut ilaapput bacheloritut, kandidatitut-, ph.d.-tut, inuussutissarsiornermut akademimi, diplomitaarnarluni aamma masteritut ilinniakkat, tak. §§ 11-16.

§ 2. Naalakkersuisut qaffasinnerusumik ilinniakkanik ataqtigiissakkanik aqqissuussissapput.

### **Kapitali 2**

#### *Ilinniakkat*

#### *Neqeroorutit aamma ilinniarsinnit aqutsineq*

§ 3. Qaffasinnerusumik ilinniartitsinerit Ilisimatusarfimmit neqeroorutigineqarsinnaapput.

*Imm. 2.* Qitiusumik inuutissarsiutinillu ilinniarsiit aamma ilinniarsiit allat Naalakkersuisunit akuerineqareernermik kingorna ilinniakkanik ingerlaqqiffiusunik neqerooruteqarsinnaapput. Qaffasinnerusumik ilinniakkat, qitiusumik inuutissarsiutinillu ilinniarsiit neqeroorutaat ilinniarsiit ilinniartitsissutigisartagaasa iluanniissapput.

*Imm. 3.* Naalakkersuisut qaffasinnerusumik ilinniakkat neqeroorutigineqartarnerat pillugu malittarisassanik aalajangersaasinnaapput, tamatumunnga ilanngullugit:

- 1) piffissaq tamaat piffissallu ilaani ilinniakkat neqeroorutaasartut,
- 2) ilinniakkat ungasianiit ilinniartitsinertut neqeroorutaasartut,
- 3) neqeroorutit akuersissutiginnissaat akuersissutillu tunuartinneqarsinnaanerit,
- 4) ilinniartitsissutinik ataasiakkaanik neqeroortarneq aamma ilinniartitsissutinut aalajangersimasunut tunngatillugu pikkorissarnerit,
- 5) naammattusaammik immikkullu ilinniartitsinernik ingerlatsinerit, kiisalu
- 6) qaffasinnerusumik ilinniakkat ilaannik nunani allani ingerlatsisinnaaneq.

§ 4. Naalakkersuisut qaffasinnerusumik ilinniakkanik neqeroorutit akuerisinnaavaat:

- 1) ilinniagaq assingusoq Kalaallit Nunaanni ilinniarfinni allani neqeroorutigineqanngippat, taamaattoq tak. imm. 2,
- 2) ilinniakkap nunat tamat akornanni pitsaassusissanut pitsaassusissallu qularnaarnissaannut aalajangersagaasut piviusunngortissinnaappagit, taamaalillunilu angusat nuunneqarsinnaanerak, ilinniartunik paarlaasseqatigiittoqarsinnaanera aamma nunat tamat akornanni akuerisaaneq anguneqarsinnaallutik.
- 3) suliffeqarnermi politikkikkut, aningaasaqarnikkut aamma inuiaqatigiinnermi isiginiagassanut naleqqiullugu ilinniagaq pisariaqartinneqartutut isigineqarpat.

*Imm. 2.* Naalakkersuisut imm. 1-imi, nr. 1-imi aalajangersakkat sanioqqunneqarnissaat aalajangiussinnaavaat, ilinniakkap Kalaallit Nunaanni ilinniarfinni arlariinni neqeroorutigineqarnissaa pisariaqartinneqarpat, aamma

*Imm. 3.* Naalakkersuisut imm. 1 naapertorlugu akuersissuteqarnissamut atugassarititaasussanik aalajangersaasinnaapput.

§ 5. Ilinniarfiit qaffasinnerusumik ilinniakkanit neqeroorutaasunit, ilinniartitsissutinik ataasiakkaanik aamma ilinniartitsissutinut aalajangersimasunut tunngatillugu pikkorissartitsinernik, Inatsisartut inatsisaat manna naapertorlugu neqeroorutaasunik, neqerooruteqarsinnaapput, taamaallaat ph.d.-tut ilinniagaq pinnagu.

§ 6. Ilinniarfiit naammattusaammik ilinniartitsinermik ingerlatsinissat, ilinniartunut qaffasinnerusumik ilinniakkami ilinnialersussatut akuerisaasunut, neqeroorutigisinnaavaat, ilinniartut ilinniagassatigut ilinniakkap naammassinissaanut pisariaqartunik tunngavissinnissaat siunertaralugu.

§ 7. Ilinniarfiit ilinniartunut bacheloritut imaluunniit kandidatitut ilinniakkami ilinnialersussatut akuerisaasunut piginnaaneqarluartunut, ilassutitut ilinniartitsinernik ingerlatsinerit neqeroorutigisinnaavaat.

§ 8. Ilinniarfiit nunani allani ilisimatusarfimmik ataatsimik arlalinnilluunniit imaluunniit ingerlatsivinnik allanik qaffasinnerusumik ilinniakkanik neqerooruteqartartunik suleqateqarlutik, ilinniakkat immikkoortuisa ilaannik nunani allani ingerlatsinissaq neqeroorutigisinnaavaat.

§ 9. Naalakkersuisut ilinniakkamik § 4, imm. 1 naapertorlugu neqerooruteqarnissamut akuersissummik tunuartitsisinnaapput, ima pisoqartillugu:

- 1) ilinniakkap neqeroorutigineqarnissaa pisariaqartinneqarunnaarpat,
- 2) ilinniakkamut pineqartumut tunngatillugu pitsaassusissamut piumasaqaatit qaqugukkulluunniit atuuttut ilinniakkap piviusunngortissinnaajunnaarpagit,
- 3) ilinniakkamut qinnuteqartartut amerlassusaat imaluunniit ilinniagaqartut naammassisartut amerlassusaat nukissatigut sillimmatigisanut ilinniakkamut atorneqartartunut naleqqiullugit naapertuukkunnaarsimappata, imaluunniit
- 4) Naalakkersuisut suliffeqarnermi politikkikkut, aningaasaqarnikkut aamma inuiaqatigiinnermi

isiginiagassanut naleqqiullugu ilinniakkamik neqerooruteqarnerup killilerneqarnissaa pisariaqartutut isigippassuk.

### *Ilinniakkat imaat siunertaallu*

**§ 10.** Qaffasinnerusumik ilinniakkat, tak. §§ 11-16, ilinniakkanik ingerlatsinerupput, European Credit Transfer System (ECTS) naapertorlugu aalajangersimasunik ECTS-pointillit.

*Imm. 2.* Piffissaq tamaat ilinniarnermik ingerlatsinerup ukiumi ataatsimi suliassartaasa assigaat 60 ECTS-point.

**§ 11.** Bacheloritut ilinniagaq tassaavoq ilisimatusarnermik tunngaveqartumik piffissaq tamaat ilinniagaq minnerpaamik 180 ECTS-pointinik naleqartoq, ilinniakkatut immikkoortut, naammassisassatut ingerlanneqartoq. Ilinniartitaaneq ilinniartitaanerit pillugit ilinniakkat aaqqissugaaneri atorfinissutaasinnaasumik bacheloritut ilinniarnertut taaneqarsinnaavoq, ilinniartitaaneq atorfinissutaasinnaasumi aalajangersimasumi atorfininnissamik siunnerfeqarpat.

*Imm. 2.* Bacheloritut ilinniakkap siunertarai:

- 1) ilinniartup ilinniartitsissummi ataatsimi amerlanerniluunniit ilisimatusarnikkut sammisassanik ilinniartinneqarnissaa, tamatumunnga ilanngullugit ilinniartitsissutip imaluunniit ilinniartitsissutip teoriivi periusaalu, tassuunakkut ilinniartoq ilinniakkamut tunngatillugu tamatigoortumik ilisimasaqalerlunilu piginnaaneqaleqqullugulu,
- 2) ilinniartup ilinniakkami ilisimasassanik aamma teoretiskimik periutsitigullu piginnaasanik pisinnaasanilu pissarsitinnissaa, tassuunakkut ilinniartoq nammineerluni ilinniartitsissutip iluani imaluunniit ilinniartitsissutip iluanni apeqqutinik assigiinngisitaartunik katitikkamik suussusilersuisinnaaleqqullugu, oqaasertalersuisinnaaleqqullugu naammassinnissinnaaleqqullugulu, aamma
- 3) ilinniartup inuutissarsiutini suliassanik ingerlatsisinnaalernissaanut aamma kandidatitut ilinniakkami ilinnialernissaanut tunngavissinnissaa.

**§ 12.** Kandidatitut ilinniagaq tassaavoq ilisimatusarnermik tunngaveqartumik piffissaq tamaat ilinniagaq minnerpaamik 120 ECTS-pointinik naleqartoq, ilinniakkatut immikkoortut, naammassisassatut ingerlanneqartoq.

*Imm. 2.* Kandidatitut ilinniakkap siunertarai:

- 1) ilinniartup ilinniagassatigut ilisimasaanik pisinnaasaanillu annertusaanissaq aamma teoretiskimik periutsitigullu piginnaasanik pisinnaasanilu kiisalu bacheloritut ilinniakkap killiffianut naleqqiullugu nammineersinnaanermik annertusaanissaq,
- 2) ilinniartup ilinniartitsissummi imaluunniit ilinniartitsissutini sammisassani periutsinilu immikkoortunik annertusisanik atuineq aqquqtagalugu ilisimasassatigut itisilerinissaa, tamatumunnga ilanngullugit ilisimatuutut suliaqarnermik periutsinillu sungiusarneq, ilinniartup inuutissarsiutini suliassanik immikkut ilisimasaqarfiunerusariaqartunik suliaqalernissaanik aamma ilisimatusarnikkut inerisaalluni sulianut peqataanissaanut piginnaanngortitsisumik, aamma
- 3) ilinniartup ingerlaqqilluni ilinniarnissaanut piginnaanngorsarnissaa, tamatumunnga ilanngullugu ph.d.-tut ilinniagaq.

§ 13. Ph.d.-mi ilinniagaq tassaavoq ilisimatuutut ilinniarneq 180 ECTS-pointinik naleqartoq, nunat tamat akornanni angusassat nalingannut piginnaaneqalersitsisumik, ph.d.-tut ilinniartumik, namminersortut pisortallu ingerlatsiviini, ilisimatusarnermik tamatigoortumik ilisimasaqarnissamik piumasaraqfiusuni, nammineerluni ilisimatusarnermi, ineriartortitsinermi aamma ilinniartitsinermi suliassanik ingerlatsisinnaalersitsisoq. Ph.d.-tut ilinniarneq annerusumik ingerlanneqassaaq ilisimatusarnermik ingerlatsinikkut.

§ 14. Inuussutissarsiornermut akademimi ilinniagaq tassaavoq ilinniagaq ECTS-pointit 120-180-illu akornanni annertussusilik, ilinniakkatut immikkoortutut, naammassisassatut aaqqissuussaq, teorii sulinerlu paarlakaallugit ingerlanneqartoq.

*Imm. 2.* Inuussutissarsiornermut akademimi ilinniagaq piffissap ilaa ilinniakkatut 60 ECTS-pointinik naleqartutut teoretiskiinnaasutullu neqeroorutigineqarsinnaavoq, ilinniartoq minnerpaamik ukiuni 2-ni inuussutissarsiummik naapertuuttumik misilittagaqarpat.

§ 15. Diplomitaarniarluni ilinniagaq tassaavoq, inuutissarsiummik aamma suliamik tunngavilimmik qaffasinnerusumik ilinniagaq 60 ECTS-pointinik naleqartoq.

§ 16. Masteritut ilinniagaq tassaavoq ilinniagaq ilisimatusarnermik tunngavilik 60 ECTS-pointinik naleqartoq, ilinniakkatut immikkoortutut, naammassisassatut ingerlanneqartoq.

*Imm. 2.* Masteritut ilinniakkap siunertaraa ilinniartup inuutissarsiuutini sulinermik misilittagaqareersup aamma ilinniakkamik tunuliaqutaqartup ingerlaqqiffiusumik ilinniagaqarnissaa, immikkut ilinniakkap iluani, imaluunniit siammasinnerusumik siunnerfeqarluni ilikkagassap ataatsip iluani imaluunniit ilikkagassat arlaqartut iluanni.

#### *Ilinniakkat aaqqissugaaneri*

§ 17. Inatsisartut inatsisaata matuma sinaakkusiussaasa iluanni, ilinniarfiit ilinniakkat pillugit malittarisassat erseqqinnerusut aalajangersassavaat, ilinniakkani tamani ilinniakkap aaqqissugaanerata allaaserineratigut, ph-d-tut ilinniagaq kisiat pinnagu. Ilinniakkat aaqqissugaaneri aamma kingusinnerusukkut taakkunani allannguutit annertunerusut Naalakkersuisuni tusarniaassutigineqassasut, taakku ilinniarfeqarfimmit aalajangersarneqarnissaat sioqqullugu.

*Imm. 2.* Ilinniakkat aaqqissugaaneri ilinniakkanut ataasiakkaanut naleqqussagaassapput, paasissutissanillu ilinniakkamut pingaaruteqartunik imaqaassallutik. Ilinniakkanut naleqquttuussusia aallaavigalugu ilinniakkat aaqqissugaanerisa makku imarissavaat:

- 1) Ilinniakkap taaguutaa kalaallisut, qallunaatut aamma tuluttut.
- 2) Ilinniakkap annertussusiligaanera ECTS-pointinik nalunaarlugu.
- 3) Ilinnialernissamut piumasqaatit, qinnuteqartut ilinniakkami inissaqartinneqartunit amerlanerutillugit qinnuteqartunik tullerriiarnissamut malittarisassat, aamma qinnuteqarnissamut killiliussat.
- 4) Ilinniakkap ilinniagassatigut ilisarnaatai, makkunanga ersersitsisut:
  - a) ilinniakkap siunertaa,

- b) ilinniakkami ilinniartitsissutit, aamma
- c) ilinniakkami ilikkagassatigut pissarsiassat.
- 5) Immikkoortukkaat pillugit malittarisassat, ilikkagassani immikkoortutut aamma ilikkagassat toqqagassat, tamatumunnga ilanngullugit:
  - a) ilisimaligassatut, pisinnaaligassatut piginnaasaqarfigiligassatullu iluseqartillugit ilikkagassatigut pissarsiassat,
  - b) annertussusaa ECTS-pointitut nalunaarsorlugu,
  - c) ilinniartitseriaatsit suleriaatsillu, aamma
  - d) peqataanissamut piumasaaqaatit.
- 6) Allattariarsorluni suliassat pillugit malittarisassat, tamatumunnga ilanngullugit bacheloritut suliassaq aamma speciali.
- 7) Soraarummeernerit pillugit malittarisassat.
- 8) Sungiusarluni sulinerit pillugit malittarisassat.
- 9) Nunani allani ilinniarnertit pillugit malittarisassat.
- 10) Ilinniartup piffissaq ilinniarfissaa sivisunerpaaq, immikkut akuerineqarnissamut periarfissat ilinniarunnaarnerlu pillugit malittarisassat.
- 11) Ilinniariikkanik nuutsitsisinnaanermut malittarisassat.

*Imm. 3.* Ilinniakkat aaqqissugaaneri ukiup ilinniarfiusup aallartinneraniit atortuulertassapput. Ilinniakkat aaqqissugaaneri, ilinniartunut ukiup ilinniarfiusup tulliani aallartittussanut atuuttussat, ilinniarfiup nittartagaani tamanut saqqummiunneqareersimassapput piffissaq qinnuteqarnissamut killiliussaq, § 19, imm. 1 aamma 2-mi aalajangersarneqartoq, nallertinnagu.

*Imm. 4.* Ilinniartut ilinniakkamik aallartitsereersut, ilinniakkap aaqqissugaanera ilinniarnerp aallartinnerani atuuttoq malissavaat. Ilinniakkap aaqqissugaanera allannqortinneqartillugu, ilinniartoq ilinniarnermi ingerlanerani ilinniakkap aaqqissugaaneranut nutaamut nooqqullugu peqquneqarsinnaanngilaq.

*Imm. 5.* Naalakkersuisut ilinniakkat aaqqissugaaneri pillugit malittarisassaliorsinnaapput, aamma piffissaq ilinniarfissaq sivisunerpaaq pillugu malittarisassat.

### *Pitsaassutsimik qularnaarineq*

**§ 18.** Ingerlaqqiffiusumik ilinniakkat ataasiakkaat pitsaassutsimikkut qularnaarneqassapput, nunat tamat akornanni aalajangersakkat naapertorlugit.

*Imm. 2.* Naalakkersuisut pitsaassutsimik qularnaarineq pillugu malittarisassiusapput.

## **Kapitali 3**

### *Qinnuteqarneq aamma ilinnialernissamut piumasaaqaatit*

#### *Qinnuteqarneq*

**§ 19.** Ingerlaqqiffiusumik ilinniakkanut augustimi imaluunniit septemberimi aallartittussanut qinnuteqarnissamut killigititaq tassaavoq 1. marts, taamaattoq tak. imm. 2.

*Imm. 2.* Ilinniarfiit qaffasinnerusumik ilinniakkanut ataasiakkaanut tunngatillugu

aalajangersinnaapput, ilinniartunik upernaakkut semesterimi aallartittussanik ilinnialertussatut akuersiniarlutik. Upernaakkut semesterimi ilinniartunik aallartittussanut qinnuteqaateqartitsinermi ilinniartunngortitsinermilu periutsit, tamatumunnga ilanngullugit qinnuteqarnissamut akissuteqarnissamullu killiliussat, malittarisassat ilinniartuup aalajangersagai nittartakkatigullu tamanut saqqummiussai malillugit pisassapput.

*Imm. 3.* Qinnuteqarnissamut killiliussa, tak. imm. 1 aamma 2, ilinniakkat ataasiakkaat aaqqissugaaneranni aamma ilinniartuup nittartagaani ersarissumik takuneqarsinnaassaaq.

*Imm. 4.* Ilinniartuup qinnuteqaatinik kingusinaartumik annguttoqartillugu, qinnuteqarnissamut killiliussa saneqqussinnaavaat, tak. imm. 1 aamma 2, pissutsit immikkut ittut tamanna pisariaqalersippassuk.

**§ 20.** Qaffasinnerusumik ilinniakkamut ilinnialerumalluni qinnuteqarneq, periaasissat Naalakkersuisunit innersuunneqartut naapertorlugit pisassaaq, tak. imm. 2.

*Imm. 2.* Naalakkersuisut qinnuteqaateqarnermi periaasissat, ilusiliussassatut piumasaqaatit aamma teknikkikkut periarfissat innersuutissavaat tamannalu ilinniartuup ilitsersuinerit pillugit nittartakkani naapertuuttuni saqqummiutissallugu.

*Imm. 3.* Imm. 1 naapertorlugu qinnuteqaatinut ilanngunneqassapput ilinniagassatut qinnutigisami ilinnialernissamut tunngavigisanut uppernarsaatit. § 19, imm. 1 aamma 2-mi qinnuteqarnissamut killiliussat naaneranni, ilinnialernissamut tunngavigisat uppernarsaataat pissarsiarineqarsimangippata, uppernarsaatit malinnaatillugit nassiunneqassapput ilinniartuup tamatumunnga killiliussaata iluani.

*Imm. 4.* Soraarummeersimanermut uppernarsaatit il.il., ilinnialerumalluni qinnuteqarnermi nassiunneqartut kalaallisut, qallunaatut, Nunat Avannarliit allat oqaasii atorlugit imaluunniit tuluttut allagaanngitsut, oqaasit pineqartut arlaannut ataatsimut nutserneqarsimanissaat pillugu ilinniartuup malittarisassanik aalajangersaasinnaavoq.

*Imm. 5.* Qinnuteqaatit, tamatumunnga ilanngullugit qaffasinnerusumik ilinniakkamut qinnuteqaatit ilinnialernissarlu pillugu attaveqaatigiinnerit, tamakkiisumik ilaannakortumilluunniit digitaliusumik pisassanersut, tamatumunnga ilanngullugu digitaliusumik aaqqissuussinerit aalajangersimasut pinngitsoorani atorneqarnissaat qularnaatsumillu kinaassutsimik ilisarsisoqarsinnaanissaa pillugit Naalakkersuisut malittarisassanik aalajangersaasinnaapput.

### *Ilinnialernissamut piumasaqaatit*

**§ 21.** Bacheloritut ilinniakkami ilinnialernissamut piumasaavoq ilinniarnertuunngorniarfimmi ilinniarsimaneq, tamatumunnga ilanngullugit immikkut aaqqissuussamik ilinniarnertuunngorniarnermik ingerlatsineq, ilinnialernissamut immikkut piumasaqaatinik naammassinnineq, tak. § 22, kiisalu karakteritigut piumasaqaataajunnartunik piviusunngortitsisinnaaneq, tak. § 23.

*Imm. 2.* Aammattaaq ilinnialernissamut piumasaqaataasinnaavoq, malittarisassat ilinniartuup aalajangersagai naapertorlugit qinnuteqartup ilinnialernissamut misilitsinnermi angusisimanissaa.

**§ 22.** Ilinnialernissamut immikkut piumasaqaatit tassaapput ilinniarnertuunngorniarfimmi ilinniartitsissutit aalajangersimasut killiffik A-, B-, imaluunniit C-miittut, tak. ilinniarnertuunngorniartarneq pillugu Inatsisartut inatsisaat.

*Imm. 2.* Ilinniartitsissutip aalajangersimasumik qaffasissuseqarnissaa piumasaappat, tak. imm. 1, qinnuteqartup ilinniartitsissutini angusinissamut killigititaq, killiffimmi tassani qaffasinnerusumiluunniit angusimassavaa, ilinniarnertuunngorniarfimmi pineqartumi karakteriliisarneq pillugu malittarisassat naapertorlugit. Ilinniartitsissummi karakterit arlallit ilaappata, karakteritigut piumasaqaat naammassineqarsimassaaq agguaqatigiissitsinermi pingaartitaq anguneqarsimappat. Karakteritigut piumasaqaat naammassineqarsinnaangilaq qummut akunnaalliliinikkut.

**§ 23.** Karakteritigut piumasaqaat ima paasineqassaaq, ilinnialissutaasinnaasumik soraarummeerneq naammassineqarsimassasoq, ilinniarnertuunngorniarfimmi pineqartumi karakteriliisarneq pillugu malittarisassat naapertorlugit, agguaqatigiissitsinermi karakteri aalajangersimasoq minnerpaatut karaktereralugu, imaluunniit ilinniartitsissutit ataasiakkaat angusiffiusimassasut karakterip minnerpaaffissaa aalajangersimasoq karaktereralugu. Piumasaqaat naammassineqarsinnaangilaq qummut akunnaalliliinikkut.

**§ 24.** Iliniakkanut ataasiakkaanut ilinnialernissamut piumasaqaatit aalajangersimasut aamma karakteritigut piumasaqaatit, tak. §§ 22 aamma 23 ilinniarfinit ataasiakkaanit aalajangersarneqassapput.

*Imm. 2.* Ilinniarfiit aalajangersinnaavaat, misilitsinnermi ilinniarfimit immikkut aqqissuussaasumi angusaq, aammalu assingusunik piginnaaneqarnermik uppersaasoq, qinnuteqartunut § 23 naapertorlugu karakteritigut piumasaqaammik naammassinninngitsunut, karakteritigut piumasaqaatinik naammassinninertut naleqartinneqarsinnaasoq.

*Imm. 3.* Ilinniarfik § 23-mi karakteritigut piumasaqaammik saneqqutsinnaavoq, pissutsit immikkut ittut tamanna pisariaqalersippassuk.

**§ 25.** Bacheloritut ilinniagaqarumallutik qinnuteqartut, ilinnialernissamut piumasaqaatit aalajangiunneqartunit, tak. § 21, allaanerusumik tunngaveqarlutik qinnuteqarnissaat ilinniarfiup akuerisinnaavaa, qinnuteqartoq piumasaqaatinut sanillinneqarsinnaasunik ilisimasassatigut piginnaaneqarpat, ilinniarfiullu nalilerpagu qinnuteqartup ilinniagaq naammassisinnaassagaa.

*Imm. 2.* Ilinniarfiup imm. 1 naapertorlugu akuersinissaminut piumasarisinnaavaa, qinnuteqartup kingusinnerpaamik ilinniarnep aallartinnerani naammattusaammik misilitsinnermi anguseqqaarnissaa, piginnaanerit pisariaqartut uppersarumallugit.

**§ 26.** Kandidatitut ilinnialernissamut piumasaavoq, naapertuuttumik bacheloritut ilinniagaqarnissaaq, tak. § 11, imm. 1, imaluunniit naapertuuttumik allamik, assingusumik qaffasissusilimmik Kalaallit Nunaanni, Danmarkimi nunamiluunniit allami ilinniagaqarsimanissaaq.

*Imm. 2.* Ilinniarfiup kandidatitut ilinniakkani ataasiakkaani ilinnialernissamut piumasaqaatit aalajangersassavai.

*Imm. 3.* Kandidatitut ilinniagaqarumallutik qinnuteqartut, imm. 1-imi ilinnialernissamut piumasaqaatit aalajangiunneqartunit allaanerusumik tunngaveqarlutik ilinnialernissaat ilinniarfiup akuerisinnaavaa, qinnuteqartoq piumasaqaatinut sanillinneqarsinnaasunik ilisimasassatigut piginnaaneqarpat, ilinniarfiullu nalilerpagu qinnuteqartup ilinniagaq naammassisinnaassagaa. Ilinniarfiup aalajangersinnaavaa, qinnuteqartup kingusinnerpaamik ilinniarnep aallartinnerani

naammattusaammik misilitsinnermi anguseqqaarnissaa, imaluunniit ilinniartitsissutinik naammattusaataasunik ingerlatseqqaarnissaa.

**§ 27.** Ph.d.-tut ilinnialernissamut piumasaavoq qinnuteqartup, ilinniakkamik qaffasissutsimigut kandidatitut ilinniakkamut nallersuunneqarsinnaasumik ilinniagaqarsimanissaa, tak. § 12, imm. 1.

*Imm. 2.* Ilinniarfiup aalajangersinnaavaa ph.d.-tut ilinniarnermik ingerlatsineq kandidatitut ilinniarnERP ingerlanneranut atasumik aallartinneqarsinnaasoq, kisianni qularnaarneqassaaq ilinniarnERP tamarmiusup, ilinniakkat marluk uiuleriissillugit ingerlanneqarnerat, annertoqatigalugulu qaffaseqatigigaa, tak. §§ 12 aamma 13.

*Imm. 3.* Ilinniarfiup aalajangissavaa kikkut ph.d.-tut ilinnialissanersut. Ilinniarfiup nittartagaani ersissaaq, ilinnialernissamik akuersinnermut piumasaqaatit suut tunngaviussanersut.

**§ 28.** Inuussutissarsiornermut akademimi ilinniakkami ilinnialernissamut piumasaavoq ilinniarnertuunngorniarmim ilinniarnermik naammassisimanissaaq, tamatumunnga ilanngullugit immikkut aaqqissuussamik ilinniarnertuunngorniarnermik ingerlatsineq imaluunniit inuutissarsiummik ilinniagaqarneq, tak. inuussutissarsiutinik ilinniartitsinerit aamma inuussutissarsiutinik ilinniartitsinerit iluanni pikkorissartitsisarnerit pillugit Inatsisartut inatsisaat. Ilinniarfiup piumasaqaatigisinnaavaa, lærlingitut isumaqatigiissuteqarsimanissaaq imaluunniit suliffeqarfimmik sungiusarluni sulinissamik isumaqatigiissuteqarsimanissaaq.

*Imm. 2.* Ilinniarfiup imm. 1-imi ilinnialernissamut piumasaqaatitut aalajangiunneqartunit allaanerumik tunngaveqarlutik qinnuteqartut ilinnialernissaat akuersinnaavaa, erseqqissumik naliliineq tunngavigalugu nalilerneqarpat, qinnuteqartoq ilinniakkap naammassinissaanut ilinniakkamigut piginnaasaqartoq. Ilinniarfiup piumasarisnaavaa misilitsinnernik ingerlatsinissat, inuit ataasiakkaarlugit oqaloqatigineqarnissat imaluunniit qinnuteqaammik tunngavilersukkamik nassiussisoqarnissaa.

**§ 29.** Diplomitaarniarluni ilinnialernissamut piumasaavoq, ilinniakkamik ilinnialissutaasinnaasumik naapertuuttumik ilinniagaqarsimanissaaq, minnerpaamik inuussutissarsiornermut akademimi ilinniakkap naligisaanik, tak. § 14, kiisalu diplomitaarniarluni ilinniakkamut tunngatillugu aalajangersarneqarsinnaasunik immikkut ilinnialernissamut piumasaqaataasinnaasunik naammassinninnissaaq.

*Imm. 2.* Ilinniakkap ilinnialissutaasinnaasup naammassinerata kingorna, qinnuteqartut inuutissarsiummi sulinermik minnerpaamik ukiuni marlunni naapertuuttumik misilittagaqassapput. Suut inuutissarsiummi sulinermik naapertuuttumik misilittagaanerannik naliliineq, ilinniarfinit isumagineqassaaq.

**§ 30.** Masteritut ilinnialernissamut piumasaavoq qinnuteqartup ilinniakkamik ilinnialissutaasinnaasumik naapertuuttumik ilinniagaqarsimanissaa, minnerpaamik ima killiffilimmik:

- 1) bacheloritut ilinniagaq, tak. § 11, imm. 1,
- 2) diplomitaarniarluni ilinniagaq, tak. § 15, imaluunniit
- 3) nunani allani ilinniagaq taakkua naleqqatigisaat, tak. nr. 1 aamma 2.

*Imm. 2.* Qinnuteqartut inuutissarsiummi sulinermik minnerpaamik ukiuni marlunni naapertuuttumik



misilittagaqassapput. Suut inuutissarsiummi sulinermik naapertuuttumik misilittagaanerannik nalilileneq, ilinniarfinnit isumagineqassaaq.

*Imm. 3.* Ilinniarfiup qinnuteqartut imm. 1-imi piunasaqaatinik naammassinninngitsut, kisiannili erseqqissumik nalileereernerup kingorna taakkununga ilinniakkatigut nallersuussinnaasumik ilinniagaqartut nalilerneqartut, ilinnialertussat akuerisinnaavai. Ilinniarfiup aalajangersinnaavaa, qinnuteqartup kingusinnerpaamik ilinniarnerup aallartinnerani naammattusaammik misilitsinnermi anguseqqaarnissaa.

**§ 31.** Ilinnialernissamut piunasaqaatinik sakkortunerulersitsineq, tak. §§ 21 aamma 26-30, atuutsitsilernissaa minnerpaamik ukiunik 2-nik sioqqullugu nalunaarutigineqartassaaq.

*Imm. 2.* Nalunaaruteqarluni ilisimatitsineq pissaaq ilinniarfiup pineqartup nittartagaani.

## Kapitali 4

### *Ilinnialertussanik killilersuineq aamma ilinniartunngortitsinnermi inissaqartitsineq*

**§ 32.** Ilinniarfiit namminneq aningaasaqarnikkut sinaakkusiussat iluanni aalajangissavaat, ilinniartut qassit iliniakkani ataasiakkaani ilinniartunngortinniarnelugit, taamaattoq tak. imm. 2 aamma 5 aamma § 9, nr. 3. Taamaattoq ilinniartut piffissaaq tamaat ilinniakkami allami ilinnialersussat akuerisaasimasut ilinniartussat akuerineqarsinnaanngillat, taamaaliornissamut immikkut illuinnartunik pequtissaqartinnagu.

*Imm. 2.* Ilinniartunngortitsinnermi inissaqartitsinerup aalajangiunnerani, ilinniarfiit qularnaassavaat, isumannaatsumik piginnaaneqarluartunillu ilinniartitsisoqarluni illutatigullu naammattunik inissaqartitsilluni ilinniartitsisoqarsinnaanissaa. Ilutigisaanik ilinniarfiit isiginiassavaat, ilinniartussat akuerineqartut amerlassusaasa inuiaqatigiinni taamatut ilinniarsimasunik pisariaqartitsinnernut naapertuuttuuneri.

*Imm. 3.* Ilinniarfiit ilinniartunngortitsinnermi inissaqartitsinerup aalajangiunneranni, utaqqisut allassimaffianni tulleriiaakkami utaqqisutut inissat qassiunissaat aalajangiussinnaavaat.

*Imm. 4.* Ilinniarfiit ilinniakkamik neqerooruteqarnissaaq pinngitsoorsinnaavaat, qinnuteqartut amerlassusaasa taamaaliornissaaq pissusissamisoortippassuk.

*Imm. 5.* Naalackersuisut ilinniakkani ataasiakkaani ukiumut ilinniartunngortitsinnermi inissaqartitsinerup amerlanerpaaffissai aamma ikinnerpaaffissai aalajangersarsinnaavaat.

**§ 33.** Ilinniakkanut ataasiakkaanut qinnuteqartut, ilinniartunut inissanit amerlaneruppata, ilinniartunngortitsisoqassaaq tulleriiaarinnermi malittarisassat ilinniakkat ataasiakkaat aaqqissugaaneranni aalajangersarneqartut naapertorlugit.

*Imm. 2.* Qinnuteqartut utaqqisut allassimaffiannut ilanngunneqarsinnaapput, qinnuteqartut piginnaanillit ilinniartunut inissanit amerlaneruppata, tak. § 32, imm. 3.

**§ 34.** Ilinniartut ilinniakkami qinnuteqaatigisaminni ilinnialersinnaasut, piffissaliussap Naalackersuisunit tamanut nalunaarutigineqartup iluani, ilinniarfiit nalunaarfigissavaat ilinniakkami inissamik neqeroorfigalugit.

*Imm. 2.* Qinnuteqartut ilinniakkami qinnuteqaatigisaminni ilinnialernissaminnut akuerisaanngitsut,

imm. 1-imi piffissaliussap iluani tamanna pillugu ilinniartinnit nalunaarfigineqassapput.

*Imm. 3.* Qinnuteqartut imm. 2-mi pineqartut, tullerriiarilluni utaqqisut allassimaffiannut ilanngunneqarsinnaasut, tak. § 33, imm. 2, tamanna pillugu, kiisalu utaqqisut allassimaffianni sumi inissisimanerminnik nalunaarfigineqassapput.

*Imm. 4.* Ilinniakkami inissaq neqeroortigineqartoq, tak. imm. 1 aamma 3, atorunnaassaaq, qinnuteqartup ilinniakkami inissamik neqeroortigineqartumik akuersinini uppersaasinngippagu, piffissaliussap neqeroorteqarnerup ilinniartinnit nalunaarutiginerani aalajangerneqartup iluani.

**§ 35.** Naalakkersuisut qaffasinnerusumik ilinniakkani ilinnialersinnaaneq ilinniartutullu akuerisaaneq pillugit malittarisassanik erseqqinnerusunik aalajangersaasinnaapput.

## **Kapitali 5**

### *Aalajangersakkat allat*

#### *Ilinniagaqarluni Kalaallit Nunaata avataaniinneq*

**§ 36.** Bacheloritut ilinniartut, tak. § 12, imm. 1, ilinniarnernup ingerlanerani ilinniarnerminnut atatillugu Kalaallit Nunaata avataani ilinniassapput, taamaattoq tak. imm. 2 aamma § 41, imm. 1. Ilinniarnermut atatillugu nunami allamiinneq ima aqqissuunneqarsinnaavoq:

- 1) semesteritut ilivitsutut,
- 2) ilinniartitsissutini ataasiakkaani imaluunniit
- 3) piffissaq sungiusarluni suliffik ataaseq amerlanerilluunniit.

*Imm. 2.* Imm. 1-imi, oqaaseqatigiinni siullerni piumasaqaataasoq kandidatinnngorniarluni ilinniartumut atuutissanngilaq bacheloritut ilinniartitaanermi pinngitsoorani nunap avataani ilinniagaqarsimanissamik kandidatitut ilinniarnissamik piumasaqaateqarfiusumi.

*Imm. 3.* Ilinniakkamut atatillugu nunami allamiinneq pillugu malittarisassat ilinniakkap pineqartup aqqissugaanerani aalajangersarneqassapput.

*Imm. 4.* Inatsisartut inatsisaat manna naapertorlugu qaffasinnerusumik ilinniakkanut allanut, ilinniartit ilinniarnermut atatillugu pinngitsoorani nunami allamiittarneq, tak. imm. 1, pillugu malittarisassanik aalajangersaasinnaapput, taamaattoq tak. § 41, imm. 2. Malittarisassat ilinniakkap pineqartup aqqissugaanerani ersissapput.

*Imm. 5.* Ilinniartit qinnuteqarenermikkut imm. 1-imik aamma malittarisassanik imm. 4 naapertorlugu aalajangersarneqartunik saneqqutsisinnaapput, pissutsit immikkut ittut tamanna pisariaqartippassuk, tamatumunnga ilanngullugit ilaqutariinni pissutsit, peqqissutsimut tunngasumik pissutsit, ilinniarnermut tunngatillugu pissutsit, ilinniagaqarluni nunanit tamanit misilittagaqarneq assigisaaluunniit.

*Imm. 6.* Ilinniartut imm. 5 naapertorlugu immikkut akuerineqartut, ilinniarnernup ingerlanissaanik allamik neqeroortigineqassapput.

#### *Ilinniartitsisut piginnaasaqarnissaannik piumasaqaatit*

**§ 37.** Naalakkersuisut Inatsisartut inatsisaat manna naapertorlugu qaffasinnerusumik ilinniakkani

ilinniartitsisut piginnaasaqarnissaannik piunasaqaatit pillugit malittarisassat aalajangersassavaat.

### *Ilitsersuisarnej*

**§ 38.** Ilinniartit ilinniartut ilinniarnermik ingerlatsinerini ilinniakkamut kingornagullu suliffissanut periarfissaasunut tunngatillugu ilitsersorneqarnissamik neqeroorfigissavaat.

*Imm. 2.* Ilinniartit ilinniartut ilinniakkaminni piffissaliussaasumut sanilliullugu kinguartooqqasut immikkut ilitsersortassavaat, ilinniagaqartup ilinniakkaminik naammassinnissinnaanissaminut periarfissaasa tapersersornissaat siunertaralugu.

*Imm. 3.* Naalackersuisut ilitsersuisarnej pillugu malittarisassanik annertunerusunik aalajangersaasinnaapput.

### *Maalaaruteqartarnej*

**§ 39.** Ilinniartit aalajangiineri, ilinniartut imaluunniit qinnuteqartut inatsisitigut inissisimanerinit tunngasut, Naalackersuisunut saqqummiunneqarsinnaapput. Maalaaruteqarnej pissaaq ullormit aalajangiinerup maalaaruteqartumut nalunaarutigineraniit sapaatip-akunneri 4 qaangiutsinnagit.

*Imm. 2.* Maalaaruteqarnej kinguartitsinermik sunniuteqarsinnaanngilaq, taamaattoq tak. imm. 3.

*Imm. 3.* Naalackersuisut maalaaruteqarnissamut periarfissat maalaarutillu suliarineqartarnerat aamma maalaarutit aalajangersimasut kinguartitsinermik sunniuteqarsinnaanerit pillugit malittarisassanik aalajangersaasinnaapput.

### *Atortuulersitsineq, atorunnaarsitsinermut ikaarsaariarnermullu aalajangersakkat*

**§ 40.** Inatsisartut inatsisaat atortuulerpoq 1. august 2019.

*Imm. 2.* Ilutigisaanik atorunnaarsinneqarpoq Isumaginninnermi perorsaasussanik ilinniartitsineq pillugu Inatsisartut peqqussutaat nr. 2, 20. maj 1998-imeersoq aamma najoqqutassat taassuma nassatarisaanik atuutsinneqartut.

**§ 41.** § 36, imm. 1 naapertorlugu nunami allamiinneq pillugu malittarisassat atuutinngillat ilinniartunut Inatsisartut inatsisaata atuutilernerata nalaani bacheloritut ilinniakkamik aallartitsisimasunut imaluunniit 1. august 2021 sioqqullugu bacheloritut ilinniakkamik aallartitsisunut.

*Imm. 2.* Qaffasinnerusumik ilinniakkanut allanut tunngatillugu pinngitsoorani ilinniarluni nunami allamiinnissaq pillugu malittarisassat, tak. § 36, imm. 4, taamaallaat atuutissapput ilinniartunut, ilinniakkani 1. august 2021-mi kingusinnerusukkulluunniit aallartittuni ilinniartuusunut.

